

BOSNA I HERCEGOVINA
BRČKO DISTRIKT BiH
OSNOVNI SUD BRČKO
DISTRIKTA BiH
BROJ: 96 o P 086753 15 P
BRČKO, 15.06.2015. godine

U IME BRČKO DISTRIKTA BOSNE I HERCEGOVINE!

Osnovni sud Brčko distrikta Bosne i Hercegovine, sudija Nijazija Kalender u pravnoj stvari tužioca A. Z. sina I. iz M., B., zastupanog po punomoćniku Goranu Mihajlović, advokatu iz Brčkog, protiv tuženog B. M. sina Š. iz M., privremeno na adresi u A., ..., radi naknade štete i isplate, v.p.s. 42.000,00 KM, van ročišta dana 15.06.2015. godine, donio je slijedeću:

P R E S U D U
- zbog propuštanja –

OBAVEZUJE SE tuženi B. M. sin Š. iz M. da tužiocu Z. A. sinu I. iz M., naknadi štetu koju je tužilac pretrpio kao posljedicu fizičkog napada dana 01.11.2013. godine i nanesenih teških tjelesnih povreda, te da mu isplati:

a) Na ime nematerijalne štete:

- Iznos od 21.000,00 KM na ime duševnih bolova zbog 35 % smanjenja opšte životne aktivnosti
- iznos od 5.000,00 KM na ime pretrpljenih fizičkih bolova
- iznos od 3.500,00 KM na ime pretrpljenog straha,
- iznos od 4.000,00 KM na ime duševnog bola zbog naruženosti

b) Na ime materijalne štete:

- iznos od 5.600,00 na ime izgubljene zarade – dobiti, zbog nesposobnosti za rad i privređivanje tokom liječenja
- iznos od 2.900,00 KM na ime materijalnih troškova liječenja
- iznose od po 250,00 KM mjesečno na ime novčane rente – naknade za smanjenu radnu sposobnost, počev od 20.02.2015. godine, kao dana podnošenja tužbe pa ubuduće, tako da dospjele iznose isplati odjednom i u cjelosti, a da određene mjesečne iznose plaća unaprijed za svaki mjesec, najkasnije do 10-og u mjesecu, na ruke ili tekući račun tužioca,

skupa sa pripadajućom zakonskom zateznom kamatom, počev od dana presuđenja pa do konačne isplate, sve u roku od 30 dana po pravosnažnosti presude, pod prijetnjom prinudnog izvršenja.

OBAVEZUJE SE tuženi da tužiocu nadoknadi troškove parničnog postupka u iznosu od 750,00 KM, u roku od 30 dana po pravosnažnosti presude, pod prijetnjom prinudnog izvršenja.

O b r a z l o ž e n j e

Dana 20.02.2015 godine tužilac A. Z. sin I. iz M., B., zastupan po punomoćniku Goranu Mihajlović, advokatu iz Brčkog, podnio je tužbu protiv tuženog B. M. sina Š. iz M., privremeno na adresi u A., ..., radi naknade nematerijalne i materijalne štete i isplate ukupnog iznosa od 42.000,00 KM, skupa sa pripadajućom zakonskom zateznom kamatom, počev od dana presuđenja pa do konačne isplate, sve u roku od 30 dana po pravosnažnosti presude, pod prijetnjom prinudnog izvršenja, kao i da tužiocu nadoknadi troškove parničnog postupka, u roku od 30 dana po pravosnažnosti presude, pod prijetnjom prinudnog izvršenja. U tužbi je istakao prijedlog da ukoliko tuženi na uredno dostavljenu tužbu ne dostavi odgovor ili ga ne dostavi u zakonskom roku sud donese presudu kojom će usvojiti tužbeni zahtjev tužioca (presudu zbog propuštanja).

Prilikom dostavljanja tužbe na odgovor, sud je tuženog u skladu sa članom 183. st. 1. Zakona o parničnom postupku Brčko distrikta BiH, «Službeni glasnik Brčko distrikta BiH» br. 8/09 i 52/10- u daljem tekstu: ZPP BD BiH) između ostalog upozorio i na to da je u tužbi traženo donošenje presude zbog propuštanja i da će ukoliko tuženi u roku od 30 dana od dana prijema tužbe ne dostavi pismeni odgovor na tužbu sud donijeti presudu kojom će usvojiti tužbeni zahtjev (presuda zbog propuštanja), ako za to budu ispunjeni i drugi zakonom propisani uslovi (član 295. stav 1. ZPP-a BD BiH).

S obzirom da je od dana 07.05.2015. godine, kao dana dostave tužbe tuženom na odgovor, kada je tuženi pročitao akt koji mu se dostavlja i odbio da potpiše prijem, protekao zakonski rok od 30 dana, a tuženi, i pored navedenih upozorenja, sudu nije dostavio pismeni odgovor na tužbu, sud je utvrdio da su ispunjeni uslovi iz čl. 183. stav 1. ZPP BD BiH i donio presudu zbog propuštanja, te odlučio kao u izreci.

Odluka o naknadi troškova parničnog postupka donesena je na osnovu člana 119. stav 1. a u vezi sa članom 129. stav 2. ZPP BD BiH. Članom 14. stav 2. Tarife o nagradama i naknadi troškova za rad advokata („Službeni glasnik Republike Srpske br. 45/00) propisano je da vrijednost boda 2,00 KM, pa se troškovi odnose na iznos od 300,00 KM (150 bodova) na ime nagrade punomoćnika tužioca za sastav tužbe, a u skladu sa članom 2. tarifni broj 1. navedene Tarife, te na iznos od 300,00 KM na ime sudske takse na tužbu i iznos od 150,00 KM na ime sudske takse na presudu zbog propuštanja, odnosno ukupno 750,00 KM, pa je sud i obavezao tuženog da tužiocu nadoknadi troškove parničnog postupka u tom iznosu

S U D I J A

Nijazija Kalender

POUKA O PRAVNOM LIJEKU:

Protiv ove presude nije dozvoljena žalba, ali tuženi može podnijeti prijedlog za povrat u pređašnje stanje. Prijedlog se podnosi ovom sudu u roku od 8 dana od kada je prestao razlog koji je uzrokovao propuštanje, a najkasnije u roku od 60 dana od dana propuštanja, u dovoljnom broju primjeraka za sud i protivnu stranu. Istovremeno sa podnošenjem prijedloga, podnosilac je dužan podnijeti i odgovor na tužbu. Blagovremeno podneseni prijedlog sprečava da ova presuda postane pravosnažna.